

共同經課 - 1 列王記上十九章一節~十五 a 節

1 A-hap 將以利亞一切所行 ê, kap 伊用刀 thài 眾先知 ê 事, lóng kā Iâ-sé-piat 講。2 Iâ-sé-piat 就差人去見以利亞, kā 伊講, 明 á 日約略 chit 時, 我若無 hō 你 ê 性命親像 in 中間一人 ê 性命一樣, 願 hiah-ê 上帝加倍責罰我。3 以利亞看見 án-ni, 就起來走, 來逃命, 到猶大 ê 別士巴, 將奴僕留 tī-hia。4 家已入去曠野, 行一日 ê 路, 到一叢羅庭樹腳; 就坐 tī-hia 求死, 講, Taⁿ soah-lah; 耶和華 ah, 求你取我 ê 性命, 因為我無比我 ê 列祖 khah 贏。5 就倒 tī 羅庭樹腳, 暈去; 有天使來搭伊, 講, 起來食。6 伊看伊, 就看見有餅 pek tī 火炭 ê 頂面, koh 有一瓶水 tī 伊 ê 頭殼邊; 伊就食就 lim, koh 倒落去。7 耶和華 ê 天使第二 pái koh 來搭伊, 講, 起來食 ah, 因為路真遠; 你行無法得。8 伊就起來食伊, lim 伊; oá 靠 chit-pái 食 ê 力, 行四十日, 四十暝, 到上帝 ê 山, 就是何烈山。9 伊到 hia, 入一個洞, 就 tiàm hit 內; 看 ah, 耶和華 ê 話臨到伊, kā 伊講, 以利亞 ah, 你 tī-chia chhòng 甚麼? 10 伊應講, 我為 tiòh 耶和華萬軍 ê 上帝大熱心; 因為以色列人棄 sak 你 ê 約, 毀壞你 hiah-ê 壇, 用刀 thài 你 hiah-ê 先知, 只有 chhun 我一人; in iáu siàu 想我 ê 性命, beh 取伊。11 講, 你出來 khiā tī 山裡, tī 耶和華 ê 面前。看 ah, 耶和華經過, 有大 koh 透 ê 風, 破裂 chiah-ê 山, phah 碎 chiah-ê 石 tī 耶和華 ê 面前; 總是耶和華無 tī 風 ê 內面; 風了後有地動; 耶和華也無 tī 地動 ê 中間。12 地動了後有火; 耶和華也無 tī 火中; 火了後, 有細 koh 輕 ê 聲。13 以利亞聽見, 就用外衫罩面, 出去 khiā tī 洞口。看 ah, 有聲臨到伊講, 以利亞 ah, 你 tī-chia chhòng 甚麼? 14 伊講, 我為 tiòh 耶和華萬軍 ê 上帝大熱心; 因為以色列人棄 sak 你 ê 約, 毀壞你 hiah-ê 壇, 用刀 thài 你 hiah-ê 先知; 只有 chhun 我一人, in iáu siàu 想我 ê 性命, beh 取伊。15 耶和華 kā 伊講, 去 ah, 你 tò 去, 到大馬色 ê 曠野。

共同經課 - 2 詩篇四十二篇

1 Khó-láh 後裔教示 ê 詩, 交 hō 樂官。1) 上帝 ah, 我 ê 心切切欣慕你, 親像鹿切切欣慕溪水。2 我 ê 心嘴乾, 欣慕上帝, 就是活 ê 上帝; 我啥時能到上帝面前, 來見伊 ah? 3 我暝日用我 ê 目屎 chún 飯食, In 對我講無 soah, 你 ê 上帝 tī toh 落? 4 我早前 kap 眾人做陣去, chhoā in 到上帝 ê 厝; 用歡喜 o-ló ê 聲, 大家守節; 我追念 chiah-ê 事, 我 ê 心極其悲傷。5 我 ê 心 ah, 你啥事鬱卒? 啥事 tī 我 ê 內面著急? 你 tiòh òng 望上帝, 因為伊 ê 面 òng 我, 來拯救我; 所以我 iáu-kú beh o-ló 伊。6 我 ê 上帝 ah, 我 ê 心 tī 我 ê 內面鬱卒; 所以我 tùi 約旦 ê 地 kap Hek-bùn, 亦 tùi Bí-sat ê 山記念你。7 你 ê 瀑布出聲, 就深淵 kap 深淵相叫應; 你 ê 波浪, 你 ê 大湧, lóng 淹密我。8 總是耶和華日時 beh 施出伊 ê 慈愛; 暝時伊 hō 我唱歌, 來求賞賜我活命 ê 上帝。9 我 beh 對上帝, 我 ê 石磬, 講, 你啥事 boē 記得我? 我啥事因為對敵 ê 壓迫, 憂悶來行 ah? 10 我 ê 對敵譏刺我, 親像 phah 碎我 ê 骨頭; In 對我講無 soah, 你 ê 上帝 tī toh 落? 11 我 ê 心 ah, 你啥事鬱卒? 啥事 tī 我 ê 內面著急? 你 tiòh òng 望上帝; 因為我 iáu-kú beh o-ló 伊; 伊是我 ê 面 ê 榮光, 亦是我 ê 上帝。

共同經課 - 3 加拉太書三章二十三節~二十九節

23 總是 chit-ê 信未到 ê 事先, 咱受顧守 tī 律法下, 圍 teh 來 thèng 候 beh 顯明 ê 信。24 Án-ni 律法是做管顧 gín-ná ê, chhoā 咱到基督, hō 咱 tùi 信來稱做義。25 但是信已經到, 就無 koh 降服 tī 管顧 gín-ná ê。26 因為 lín tùi 信靠基督耶穌, lóng 做上帝 ê kiáⁿ。27 因為 lín 見若受洗禮來入 tī 基督 ê, 是 bat 穿基督。28 無有猶太 á 是希利尼, 奴僕 á 是自由 ê, ta-po 人婦人人 ê 分別; 因為 lín tī 基督耶穌 lóng 是一個。29 Lín 若屬基督就做亞伯拉罕 ê 後裔, 照應允來做後嗣。

共同經課 - 4 路加福音八章二十六節~三十九節

26 船到 Keh-lah-sim 人 ê 地方, 就是加利利 ê 對面。27 耶穌離開船, 上岸; 有一人 tùi 城裡出來 tú-tiòh 伊, 是患 tiòh 鬼 ê, 久久無穿衫無 tiàm 厝內, 獨獨 tiàm tī 墳墓中。28 看見耶穌就喉叫, 仆 tī 伊 ê 面前, 大聲講, 至高上帝 ê Kiáⁿ 耶穌, 我 kap 你有甚麼干涉? 求你莫得苦楚我。29 因為耶穌有命令邪神 tùi hit-ê 人出來。因為邪神常常掠伊; 人用鐵鏈鏈伊, 用腳鏑鏑伊, 來顧守伊; 伊就 chhoah 斷所縛伊 ê 器具, 伊 hō 鬼趕到曠野。30 耶穌問伊講, 你叫甚麼名? 伊講, 營; 因為有 choē-choē 鬼入伊 31 鬼求耶穌莫得吩咐 in 入深淵。32 Tī hia 有 kui 陣豬, tī 山裡 teh 討食。鬼求伊准 in 入 hiah-ê 豬。就准 in。33 鬼就 tùi hit 人出去, 入 hiah-ê 豬; kui 陣豬就走落山坪, chông 落湖, 格死。34 顧豬 ê 看見 chit-ê tai-chì 就走去, 報城內 kap 鄉社 ê 人知。35 In 就出來, ài 看 chit-ê tai-chì; 就近耶穌, tú-tiòh 鬼所對伊出來 hit 人, 穿衫, hāi-chāi, 坐 tī 耶穌腳下; in 就驚。36 看見 ê 人將患 tiòh 鬼 ê 人怎樣得 tiòh 救報 in 知。37 Keh-lah-sim 四方 ê 人 lóng 求耶穌離開 in; 因為 in 大驚 ê 緣故; 伊就上船 tò-tng 去。38 鬼所對伊出去 ê 人求 beh kap 伊去。但是耶穌差伊去講, 39 tò 去 lín tau, 將上帝為 tiòh 你行 hiah 大 ê 事排列 hō 人知。伊就去, 遍城宣傳耶穌為 tiòh 伊所行 hiah 大 ê 事。